

Jahresrückblick Mädchenriege 2022

Im Jahr 2022 hei mir äntlech wieder mau ds ganze Jahr lang unigschränkt chönne turne uh das hei gloubs aui super gfunge.

Üse erst Event isch im Apriu, dr Jugendspiutag in Brüttele gsi. Dört hei mir mit ganz viu üebe, zwöi mau ä Podestrang erzieut. Ei Gruppe vor Ungerstuefe het im Ball über die Schnur dr 1. Platz und d Oberstuefe het im Volleybau dr 3. Platz erobert.

Im Juni hei mir de nach zwöi Jahr wieder mau a z'Kantonale Turnfest chönne. Uh zu üsem Glück isch das nur grad zwöi Dörfer witer, in Lyss gsi. Ou am Turnfest hei mir's uf's Podest gschaft. Vor Oberstuefe isch eis Meitschi im Einzuwettkampf z oberst ufem Podest gstande. Und im Vereinswettkampf si mir mit dr Jugi zäme 3. worde.

Nach em ne erfougriche Turnfest hei mir Endi Juni ds letschte Training mit dr Jugi zäme gmacht. Wie scho die letschte Jahr isch z Motto Meitschi gäge Giele gsi. Leider het ou das Jahr wieder d Jugi gwunne... Aber irgendwann hole mir üs dä Sieg vom erste Jahr zrüg.

Im Herbst isch d Meitschiriege Ungerstuefe a Städlilouf in Aarberg. Uh wär häts denkt, ou dort het eis Meitschi ä Goldmedaille hei bracht.

Im Oktober hei mir de mit em Gäud vo de gsammlte Migros Vereinsbons ä Usflug chönne mache. Hie nomau äs grosses Merci a aui wo hei ghoufe sammle. Bi däm Usflug si mir uf Lyss is Judo gange uh hei ä gführti Judolektion bercho. Am Nami heimer ner z Stude ir Turnhau fürs Soirée güebt uh no paar Spieli gmacht. Zum Schluss hets äs zVieri gäh mit sauber gmachte Cake.

Nach de Herbstferie hei mir üs de ads Üebe fürs Soiree gemacht. D Ungerstuefe isch aus Sandsturm in Gäub, Orange und Beige über d Bühni gwindet uh bir Oberstuefe heiter aui eifach nur z Gfüeh gha, dass si uf dr Bühni si gsi. Ä Fata Morgana isch nämlech öpis wo me denkt es gits uh am Schluss ischs gar nid da gsi.

Üses Turnerjahr hei mir de am 15. Dezember mit dr Jugi zämä im Wald la usklinge. Ds Wätter het leider nid so wöuä mitmache, drfür isch d Überraschig vom Samichlous umso schöner gsi.

Aues i auem ischs äs super Jahr gsi uh mir fröie üs ufs nächste.

D Meitschiriegeleiterinne, Mara, Ella, Celia, Lea und Sandra